



2015eko urtarrilaren 22a, osteguna

UDAL ADMINISTRAZIOA

IBARRAKO UDALA

Merkataritzako eta etxeko hondakinak bildu eta tratatzeko zerbitzua arautuko duen ordenantzaren behin-betiko onarpena.

Jendaurrean jarrita egoteko arauzko epea inolako kexarik eta oharrik aurkeztu gabe igaro ondoren, 2014ko urriaren 30ean udalbatzarrak egindako ohiko osoko bilkuran hartutako hasierako erabakia indarrean jarri da eta behin betiko bihurtu da. Erabaki horren bidez, Ibarako eremuan etxeko eta merkataritzako hondakinak bildu eta tratatzeko zerbitzua arautuko duen ordenantza onartu zuen. Jarraian araudiaren texto osoa argitaratu dugu, apirilaren 2ko 7/85 Legeak, Toki-administrazioaren Araubidearen Oinarriak arautzen dituenak, 70.2 artikuluan xedatutakoa bete dadin.

Ibarra, 2015eko urtarrilaren 15a.—Bitarteko idazkaria.

(348)

III ERANSKINA

I. TITULUA

XEDAPEN OROKORRAK

1. artikulua. Zerbitzuen xedea eta eremua.

1.1. Ordenantza honen xedea da Ibarako herrian sortzen diren etxeko eta merkataritzako hondakin ez-arriskutsuak biltzeko zerbitzuak Ibarako Udalak zein baldintzatan emango dituen eta erabiltzaileak nola erabiliko dituen arautzea (Tolosako Mankomunitatearen ordenantza euskarri izanik).

1.2. Ordenantza hau ez zaio aplikatuko Ibarako udalerrian sortutako industria-hondakin ez-arriskutsuen kudeaketari. Hondakin horien bilketa eta tratamendua «Tolosaldeko Mankomunitatea osatzen duten udalen eremuan dauden industria eta enpresa guneeetan eta beste jarduera batzuetan hondakinak biltzeko zerbitzua arautuko duen ordenantzaren» bidez dago araututa. Ordenantza hori behin betiko onartu eta Gipuzkoako ALDIZKARI OFIZIALEAN argitaratu zen 2010eko azaroaren 15ean.

1.3. Zerbitzu horiek jasoko dituzte aipatutako zerbitzuen onura edo eragina duten pertsona fisiko nahiz juridiko guztiek, baldin eta Ibarako herrian helbidea badute (salbuespenez aldameneko herrietan helbidea duten kasuren batean gertutasun edo kudeaketa arrazoiengatik bi udalerriek horrela erabakitzen badute Ibarako Udalak arautuko du). Erabiltzaileek indarrean dauden

xedapenen eta ordenantza honen arabera erabiliko dituzte zerbitzu horiek.

2. artikulua. Aplika daitezkeen araudia.

Ordenantza honen araudiak Hondakin eta lurzoru kutsatuei buruzko uztailaren 28ko 22/2011 Legea (2011ko uztailaren 29an, BOEren 181. zenbakian argitaratua) eta aplika daitezkeen gainerako xedapenak ditu oinarri.

3. artikulua. Definizioak.

Ordenantza honen arabera, honako kontzeptu hauen definizioa hauxe izango da:

— Hondakin: Bere edukitzaileak utzitako edo uzteko asmoa edo obligazioa duen edozein substantzia edo objektu.

— Etxeko hondakinak: Etxeko jardueren ondorioz etxeetan sortzen diren hondakinak. Halaber, -etxeko hondakinak dira zerbitzu edo industrietan sortu eta aurrekoekin pareka daitezkeen hondakinak. Eta baita etxeetan sortzen diren zenbait hondakin ere, hala nola, tresna elektriko eta elektronikoak, arropa, pilak, metagailuak, altzariak eta lanabesak, eta etxeko eraikuntza eta konponketarako obra txikiek sortutako obra-hondakinak.

— Etxeko hondakinak izango dira bide publiko, berdegune, aisigune eta hondartzak garbitzen direnean sortzen diren hondakinak, bai eta etxeko animalia hilak eta kalean utzitako ibilgailuak ere.

— Merkataritza-hondakinak: Merkataritzaren beraren jarduerak, handizkako zein txikizkako merkataritza-jarduerak, jatetxe eta tabernetako zerbitzuak, bulego eta azoketako jarduerak, bai eta zerbitzuen sektoreko gainerako jarduerak sortutako hondakinak.

— Industria-hondakinak: Industria-jarduerako fabrikazio, eraldaketa, erabilera, kontsumo, garbiketa edo mantentze-lanetako prozesuetan sortutako hondakinak, azaroaren 15eko 34/2007 Legean araututako atmosferarako isurketak alde batera utzita.

— Hondakinen edukitzaile: Hondakinak sortzen dituen edo hondakinak dituen beste pertsona fisiko edo juridikoa.

— Negoziatzaile: Bere kaxa hondakinak erosi eta ondoren saltzen dituen pertsona fisiko edo juridiko oro, hondakinak fisikoki hartzen ez dituzten negoziatzaileak barne.

— Eragile: Hirugarren pertsona batzuen enkarguz hondakinen baliotzea edo ezabatzea antolatzen duen pertsona fisiko edo juridiko oro, hondakinak fisikoki hartzen ez dituzten eragileak barne.

— Hondakinen kudeaketa: Hondakinak bildu, garraiatu eta tratatzea, bai eta lan horien jarraipena egitea ere, bai eta hondakinak itxi osteko mantentze-lanak ere, negoziatzaile edo eragile gisa eginiko jarduerak barne.

— Hondakinen kudeatzaile: Hondakinen kudeaketa osatzen duten lanetako edozein egiten duen eta baimen edo komunikazio bidez erregistratutako pertsona edo erakundea, publikoa edo pribatua, hondakinak sortzen dituen izan ala ez.

— Bilketa: Hondakinak biltzea, tratamendu-instalazio batera garraiatzeko egiten den hasierako sailkapen eta biltegitratzea barne.

— Gaikako bilketa: Hondakin-fluxu bat bereizita biltzea, hondakin mota eta izaeraren arabera,

hondakin horren berariazko tratamendua errazteko asmoz.

— Berrerabiltzea: Hondakinak ez diren produktuak edo produktuen osagaiak sortu zirenean zuten xede bererako berriz erabiliz egiten den edozein operazio.

— Birziklatzea: Hondakin-materialak berriz produktu, material edo substantzia bihurtzen dituen baliotze-operazio oro, jatorrizko xedea izan edo beste edozein xederekin egiten bada ere. Gai organikoaren eraldaketa ere barne hartzen du, baina ez baliotze energetikoa, ez eta erregai gisa edo betelanelarako material gisa erabiliko diren material bihurtzeko prozesuak.

— Tratamendua: Baliotze edo ezabatze operazioak, baliotu edo ezabatu aurretik egiten den prestaketa-lana barne.

— Balioztatzea: Edozein operazio izan daiteke baldin eta emaitza nagusia beste material batzuk ordezkatzekoan hondakina baliagarri bihurtzen badu, beste modu batera, hondakin hori funtzio jakin bat betetzeko erabili behar bazen, edo hondakina funtzio hori instalazioan edo ekonomian, oro har, betetzeko prestatzen badu.

— Ezabatzea: Baliotzea ez den beste edozein operazio, nahiz eta operazioak, bigarren mailako ondorio gisa substantziak edo energiaren aprobetxamendua izan.

4. artikulua. Zerbitzua derrigorrez erabili eta hartzea.

4.1. Ibarako Udalari dagokio (Tolosaldeko Mankomunitatearekin batera) Ordenantza honetan ezarritako moduan etxe, merkataritza eta zerbitzuen sektorean sortutako etxeko hondakinak bildu, garraiatu eta tratatzeko zerbitzua ematea, 22/2011 Legearen 12.5 artikuluan xedatutakoaren, hala badagokio, Euskal Autonomia Erkidegoak xeda ditzakeenaren eta ekoizlearen erantzukizun erantsiaren arloan dagoen araudi sektorialaren esparru juridikoan.

4.2. Hondakin horiek dituzten pertsonak nahitaez Ibarako Udalari eman behar dizkiote hondakin horiek baliotu edo ezaba ditzan, Ordenantza honetan zehaztutako baldintzetan.

5. artikulua. Hondakinak uztea.

Debekatuta dago hondakinak kontrolik gabe utzi, bota edo ezabatzea, bai eta horien kudeaketa zailduko duen edozein nahasketa egitea ere. Erabiltzaileak behartuta daude hondakin horiek Ibarako Udalak finkatutako egutegi, ordutegi eta baldintzen arabera uztera.

6. artikulua. Bilketaz arduratzen diren langileak legitimatzea.

6.1. Ibarako Udalak (Tolosaldeko Mankomunitateak zehaztutakoari jarraiki) zerbitzuak soilik egin dezake hondakinen bilketa. Beraz, debekatuta dago Ordenantza honetan adierazitako pertsona fisiko edo juridikoak ez diren beste batzuei hondakin ez-arriskutsuak eman, saldu edo lagatzea, 22/2011 Legearen 17. artikuluan xedatutako kasuetan salbu.

6.2. Ibarako Udalak hondakinen kudeaketa-jarduerak zuzenean egiteko aukera du edo tokiko araubideari buruzko legedian aurreikusitako beste edozein kudeaketa modu erabil dezake.

7. artikulua. Zerbitzua emateagatiko tasa.

Ibarako Udalak Tolosaldea Mankomunitateko kide bezala, Mankomunitatea osatzen duten udalek urtero hondakinak bildu eta tratatzeko zerbitzua emateari dagokion tasa ezarriko du. Horretarako,

ahal den neurrian, proportzionaltasun printzipioa aplikatuko du sortutako hondakin kopuruaren eta ordaindu beharreko kopuruaren artean eta baita tarifaren diskriminazio positiboaren printzipioa, hau da, tarifa murriztea bultzatuko da, berrerabiltzeak, birziklatzeak eta konpostatzeak azken tratamenduaren aurrean lortutako mailaren arabera. Erabiltzaileek tasa hori ordainduko dute, Ibarako ordenantza fiskalak xedatutakoarekin bat etorriz.

II. TITULUA

BILKETA ZERBITZUA

I. KAPITULUA. BILKETA ARRUNTA

8. artikulua. Bilketa arruntaren xede diren hondakinak.

Ordenantza honen arabera, hondakinen bilketa arruntaren xede honako hondakin hauek izango dira:

- a) Etxeko jardueren ondorioz etxeetan sortzen diren etxeko hondakinak. Halaber, etxeko hondakinak dira zerbitzu edo industrietan sortu eta aurrekoekin pareka daitezkeen hondakinak.
- b) Merkataritza-hondakin ez-arriskutsuak, merkataritzaren beraren jarduerak, jatetxe eta tabernetako zerbitzuak, bulego eta azoketako jarduerak, bai eta zerbitzuen sektoreko gainerako jarduerak sortutako hondakinak.

Aipatutako hondakin horiek Ibarako Udalak horiek biltzeko zehaztu dituen egun, ordu, modu eta lekuan utziko dira.

9. artikulua. Bilketa arruntaren zerbitzuan sartzen ez diren hondakinak.

Ondorengo hauek bilketa arruntetik kanpo daude, eta beraz, ez dira derrigorrez jasotzekoak:

— Indusketarako produktuak, lurrak eta obra publiko nahiz pribatuko edozein obra-hondakin.

— Etxeko eraikuntza eta berrikuntzarako obra txikietako hondakinak, hala nola, obra-hondakinak, zura, ate eta leihoetako markoak, zokaloak, pertsianak, tarimak, zoruak, moketak, bainuontziak, komunak, konketak, sukaldeko altzariak, erradiadoreak eta antzekoak eta, oro har, obra-lanetako edozein hondakin.

— Edozein motatako pneumatikoak.

— Lorezaintzako eta berdeguneen mantentze-lanetako inausketa eta mozketetan sortutako hondakinak.

— Animalien hilotzak eta Europako Parlamentu eta Batzordearen 2009ko urriaren 21eko 1069/2009 EE araudiak jasotzen dituen animalien azpi-produktuak.

— Etxebizitzak usterakoan edo altzariak aldatzerakoan uzten diren tamaina handiko altzari edo tresnak, ezin direnak isolatutzat jo, etxebizitzetako altzarientzat edo etxebizitzaz aldatzerakoan erabiltzen diren bilgarriak barne.

— Bide-garbiketako hondakinak.

— Abandonatutako ibilgailuak.

— Ibarako Udalak (eta modu berean Tolosako Mankomunitateak) berariaz zehaztutako beste edozein hondakin, bere izaera edo berezitasunengatik, hondakinak jasotzen dituen Mankomunitateko zerbitzuak ezin dituelako jaso.

10. artikulua. Derrigorrezko zerbitzua.

Ibarako Udala beharturik dago etxeko eta merkataritzako hondakin ez-arriskutsuak bildu, garraiatu eta tratatzeko zerbitzua eskaintzera eta derrigorrez jaso beharrezkotzat jotzen diren hondakinak kentzeaz arduratuko da. Aipatutako hondakin horiek Ordenantza honen 8. artikuluan adierazten direnak dira.

11. artikulua. Prestazioak.

Zerbitzuaren eginbeharrak honako hauek dira:

— Hondakinak Ibarako Udalak ezarritako lekuetatik eta moduan eraman eta bilketarako ibilgailuetan hustea.

— Behin hustu eta gero, edukiontziak jatorrizko lekuetara itzultzea.

— Lan horien ondorioz bide publikoan eror daitezkeen hondakinak kentzea.

— Hondakinak dagozkien tratamenduko instalazioetara edo Transferentzia Estazioetara garraiatu eta deskargatzea, geroago trata daitezen.

— Kanean dauden edukiontziak aldiro-aldiro garbitu eta horien mantentze-lanak egitea.

12. artikulua. Hondakinen jabetza.

12.1. Hondakinak sortzen edo edukitzen dituztenek, Ordenantza honetan zehazten diren baldintzetan jarriko dituzte Hondakin Kudeatzailearen esku, hau da, Ibarako Udala eta Tolosaldeko Mankomunitatearen esku. Mankomunitatea izango da entregatu eta biltzen diren une beretik horien guztien jabea. Hondakin sortzaile edo edukitzaileak salbuetsita geratuko dira hondakin horiek sortitzaketen kalteen ondoriozko erantzukizunetatik, beti ere entregatzeko orduan Ordenantza hau eta legezko gainerako arauak bete badira.

12.2. Debehatuta dago bide publikoan, dagozkien zerbitzuek jasoko zain, utzi diren hondakinak manipulatu, aukeratu eta horien jabe egitea.

13. artikulua. Zerbitzua ematea.

Mankomunitateak hondakinen gaikako bilketa ezarriko du bilketa horren edozein modalitatetan, ekarpenak egiteko guneetarako edukiontziak bide publikoan jarriz, «atez ate» edo horien konbinazio baten bidez. Bilketaren maiztasuna Ibarako Udalak erabakiko du herriko beharren arabera.

14. artikulua. Programazioa.

Ibarako Udalak (eta Tolosaldeko Mankomunitateak) aurreikusitako bilketa-zerbitzuen egun, ordutegi, modu eta lekuen berri emango du hainbat baliabideren bidez (informazio-oholak, web-orria, informazio-liburuxkak postontzietan, publizitatea, tokiko aldizkariak, etab.).

Ibarako Udalak (eta Tolosaldeko Mankomunitateak), zerbitzuaren beharren arabera, interes publikoa dela eta, egokien iruditzen zaizkion aldaketak egin ditzake, zerbitzuan egingo diren

aldaketak nahikoa denboraz jakinaraziz.

Mankomunitateko lehendakariak edo Ibarako Udalak behar diren xedapenak emango ditu larrialdi, ustekabeko edo ezinbesteko egoeretan. Xehetasunak Ibarako Udaleko Alkatearen Bandoaren bidez arautuko dira.

15. artikulua. Larrialdi-kasuak.

Larrialditzat jotzen diren kasuetan, hala nola, gatazka sozial, uholde, elurte edo ezinbesteko beste egoera batzuetan, zerbitzua ezin eman badaiteke eta aurrez, aldi berean edo modu koordinatuan udalek jakinarazi badute, bizilagunek ez dituzte hondakinak horretarako dauden guneetan utziko zerbitzua normalizatu arte edo Mankomunitateak dagozkion argibideak eman arte.

16. artikulua. Hondakinak jasotzeko edukiontziak eta beste elementu batzuk.

16.1. Mankomunitatearen zerbitzuek udalerriekin modu koordinatuan ezarriko dute bide publikoan jarri beharreko edukiontzien edo hondakinak biltzeko beste ontzi batzuen edo «atez ateko» bilketarentzako kubo edo poltsak eusteko euskarrien ezaugarriak, kolorea, edukiera, fabrikazio-materiala, kokalekua eta kopurua, bai eta oro har erabiltzaileek hondakinak emateko egokitzat jotzen den edozein elementurenak ere.

16.2. Mankomunitatea osatzen duten udalek lurrazpiko edukiontzi-irlak instalatzeko aukera izango dute, beti ere une bakoitzean Ibarako Udalak erabakitzen duen bilketa-sistema arruntarekin bateragarriak badira. Irla horiek honako baldintzak beteko dituzte:

— Lurrazpiko bihurtzeko obra zibila eta puntuaren instalazioa hori eskatzen duen udalaren kargura izango da eta, hala badagokio, sustatzailearena, urbanizazio berrien kasuan.

— Lurrazpiko puntuaren kokapenerako eta instalazio-ezaugarri teknikoak zehazteko, aurrez Mankomunitateko Zerbitzu Teknikoen oniritzia izango du Ibarako Udalak.

— Puntu bakoitzean kokatu beharreko eta hondakinen frakzio desberdinak bereizita jasotzeko lurrazpiko edukiontzien kopurua eta edukiera Mankomunitateko Zerbitzu Teknikoen zehaztapenak kontutan hartuko ditu Ibarako Udalak.

— Hondakinak botatzeko ahoak Mankomunitateko Zerbitzu Teknikoek zehaztutako kolore, testu eta ezaugarrien bidez identifikatuko dira.

— Instalazioa amaitzean, Udalak Mankomunitateko Zerbitzu Teknikoei instalazioaren erabilera eta mantentze-lanen eskuliburua, «EE» onespren adierazpena, zatikatze osoa eta instalazioaren segurtasunarekin lotutako gainerako agiriak emango dizkie. Halaber, lurrazpiko edukiontzi mota bakoitzeko, gutxienez, urrutiko aginte bat eta instalazioa automatikoki irekitzeko erreserba-aginte bat emango dizkie.

— Edukiontzien garbitze eta mantentze lan arruntak Mankomunitatearen erantzukizuna izango dira.

— Instalazioaren gabezia edo matxurak direla eta, hondakinak ezingo balira bildu, Udalak ahalik eta azkarren konponduko du erabiltzaileei ematen zaien zerbitzua bermatzeko.

— Bilketa-zerbitzuarekin zerikusirik ez duen arrazoiren batengatik, instalazioa nahikoa ez eta handitu beharko balitz (etxebizitza berriak eraiki izana edo gunean saltoki berriak ireki izana, hondakin-kopuruak handitu izana, etab.), Udala izango da handitzeko aipatu lanak egiteko arduraduna.

— Mankomunitatea izango da hondakinen bilketarako burutzen diren operazioen ondorioz sor

daitezkeen kalte-galeren erantzule. Instalazioaren egoera kaxkarraren erruz eragin daitezkeen kalte-galeren erantzulea, berriz, Ibarako Udala izango da.

17. artikulua. Garbitze eta mantentze lanak.

Mankomunitateko zerbitzuek edukiontzien garbitze eta mantentze lanak aldian-aldian egingo dituzte, bai eta premiazko egoeretan ere.

18. artikulua. Erabiltzaileen eskubide, betebeharrak eta erantzukizunak.

Ordenantza honetan zehaztutako edozein hondakin duen pertsonak, bai eta Mankomunitateak derrigorrean jaso beharreko edozein hondakin duenak ere, Mankomunitateak eskaintzen dituen bilketa-zerbitzuak erabiltzeko eskubidea du.

Mankomunitateko Zerbitzuek irizten badute edukitzaileak utzi nahi dituen hondakinek, horien osaera eta kopuruagatik dituzten ezaugarriak direla eta, horiek jaso, garraiatu, baliotu edo ezabatzeko lanak ohiz kanpokoak direla, edukitzailea derrigortu dezakete hondakin horiek bere kabuz kudeatzera eta, hala badagokio, Mankomunitateak horretarako egokitutako lekura edo lekuetara garraiatzera.

19. artikulua. Erabilera-arauak.

— Zerbitzuaren erabiltzaileak derrigortuta daude hondakinak bereizita, hau da, horien mota eta izaeraren arabera sailkatuta, uztera Mankomunitatearen programazioaren bidez jakitera emango dituen argibideak jarraituz.

— Debekatuta dago hondakinak kontrolik gabe utzi, isuri edo ezabatzea, bai eta horien kudeaketa zailtzen duten nahasketa oro ere. Erabiltzaileak derrigortuta daude hondakinak Ibarako Udalak eta Tolosako Mankomunitateak bere programazioan ezarritako egutegi, ordutegi, leku eta moduan uztera.

— Debekatuta dago zerbitzurako hiri-altzarien funtzioa edo estetika hondatzen duen edozein jarduera egitea, bai eta Mankomunitateak erabiltzaileei hondakinen frakzio desberdinak jatorrian bereiztea errazteko emandako ontzi edo beste elementuenak ere.

— Debekatuta dago hondakinak bide publikoan manipulatzeko.

20. artikulua. Frakzio organikoa gaika biltzea.

20.1. Zerbitzuaren erabiltzaileak frakzio organikoa Mankomunitateak ezarritako egun, ordu, modu eta lekuan entregatzera derrigortuta daude.

Horretarako, Mankomunitateak erabiltzaileei ontzi egokiak eta informazio zehatza emango die bereizi beharreko hondakinen inguruan.

Zerbitzuaren erabiltzaileak derrigortuta daude frakzio organikoa poltsa konpostagarrietan uztera. Poltsa horiek, behar bezala itxita, Mankomunitateak horretarako jarri dituen edukiontzi marroien barruan utziko dituzte, edo «atez ateko» bilketa-sisteman horretarako adierazitako leku eta moduan.

Edukiontzi bidezko bilketa modalitatean, frakzio organikoa edukiontzi marroian sartuko da.

20.2. Frakzio organikoan, sukaldeko hondarrak barne hartzen dira, landare zein animalienak, gordinik zein kozinatuak, hala nola: Fruta eta barazki hondarrak, arrautza azalak, fruitu lehorren azalak, ogia eta opilak, fruta hezurak, loreak eta landareak, baratze eta lorategiko hondarrak

(belarra, inausketa xehatua), kozinatutako janari hondarrak, haragi eta arrain hondarrak, hezurak, marisko azalak, sukaldeko papera, paperezko ezpainzapi eta ahozapi zikinak, infusio-poltsatxoak, kafe hondarrak eta iragazkiak, kortxozko tapoiak eta, oro har, Konpost Plantan konposta daitekeen edozein material.

20.3. Debekatuta dago frakzio organikoarekin batera goian aipatutako hondakinak ez diren beste motatako hondakinak ematea, bereziki lorezaintzako zurezko hondarrak (adarrak, enborrak), lurra, zigarro-puntak eta hautsontzi-hondarrak, animalien gorotzak, xurgagailuko edo erratzaren hondarrak, pixoihalak eta konpresak, olioak eta, oro har, konpostagarria ez den edozein material solido. Ezin da plastikozko poltsarik erabili (ez konpostagarriak) frakzio organikoa emateko edo ontziratatu gabe emateko, Mankomunitateak horretarako baimena ematen ez badu behintzat. Debekatuta dago frakzio organikoa edukiontzi marroitik kanpo uztea.

21. artikulua. Etxeko paper eta kartoiaren gaikako bilketa.

21.1. Zerbitzuaren erabiltzaileak papera eta kartoia Mankomunitateak ezarritako egun, ordu, modu eta lekuan entregatzera derrigortuta daude.

Zerbitzuaren erabiltzaileek papera eta kartoia Mankomunitateak horretarako jarri dituen urdin koloreko edukiontzien barruan utziko dute, edo «atez ateko» bilketa-sisteman horretarako adierazitako leku eta moduan. Kartoia behar bezala tolestuta entregatuko da.

Edukiontzi bidezko bilketa modalitatean, papera eta kartoia edukiontzi urdinean sartuko da.

Bestalde, ekoizle edo edukitzaileek papera eta kartoia beren kabuz Mankomunitatearen garbiguneetan utz dezakete.

21.2. Paper/kartoi frakzioak, egunkariak, aldizkariak, liburuak, gutun-azalak, propaganda, administrazio-papera, kartoizko kaxak eta bilgarriak, etab. izango ditu.

21.3. Debekatuta dago paper eta kartoiarekin paper edo kartoi garbia ez den beste material batzuk uztea, bereziki plastikoak, zumitzak, brikak, paper zikina, etab. Debekatuta dago papera/kartoia edukiontzi urdinetik kanpo uztea.

22. artikulua. Ontzi arinen gaikako bilketa.

22.1. Zerbitzuaren erabiltzaileak ontzi arinak Ibarako Udalak ezarritako egun, ordu, modu eta lekuan entregatzera derrigortuta daude.

Zerbitzuaren erabiltzaileek ontzi arinak Mankomunitateak horretarako jarri dituen edukiontzi horien barruan utziko dituzte, edo «atez ateko» bilketa-sisteman horretarako adierazitako leku eta moduan.

Edukiontzi bidezko bilketa modalitatean, ontzi arinen frakzioa edukiontzi horian sartuko da.

22.2. Ontzi arinen frakzioak honako ontziak jasoko ditu: edari eta garbiketa produktuen ontziak, kontserba-poto metalikoak, edari-latak, jogurt eta antzekoen ontziak, olio eta ozpinenak, xanpu, gel eta antzekoenak, plastikozko poltsak, esne, zuku, ardo eta tomateen ontziak, spray potoak, kafe edo ur makinaren edalontziak, plastikozko erretiluak, poliespanezenkoak eta aluminiozkoak, tapak eta tapoiak, opilen eta litxarrerien poltsak, blisterra, lata eta botilen pack finkatzaileak, hortzetako pastaren tuboak eta antzekoak eta, oro har, ECOEMBESen «puntu berdea» logoa duten metal, brik

eta plastikozko ontzi guztiak.

22.3. Debekatuta dago ontzi arin garbiak ez diren beste material batzuetako ontziak ontzi arinekin ematea, bereziki, beirazko ontziak, esekigailuak, jokoak, boligrafoak eta errotulagailuak, zartaginak, kazolak eta etxeko hatuak, etxetresna elektriko txikiak (plantxak, lehorgailuak, etab.), diskoak edo datu-zintak, audioa eta bideoa (CD, DVD, VHS, biniloa). Debekatuta dago ontzi arinak edukiontzi horitik kanpo uztea.

23. artikulua. Beirazko ontzien gaikako bilketa.

23.1. Zerbitzuaren erabiltzaileak beirazko ontziak Ibarrako Udalak ezarritako egun, ordu, modu eta lekuan entregatzera derrigortuta daude.

Zerbitzuaren erabiltzaileek beirazko ontziak Mankomunitateak horretarako jarri dituen iglu moduko edukiontzi berdeen barruan utziko dituzte, edo «atez ateko» bilketa-sisteman horretarako adierazitako leku eta moduan.

Edukiontzi bidezko bilketaren modalitatean, beirazko ontzien frakzioa edukiontzian 8:00ak eta 22:00ak artean sartuko da eta, betiere, Mankomunitateak bizilagunen ongizatean eraginik ez izateko egokien irizten dion ordutegian.

Bestalde, ekoizle edo edukitzaileek beirazko ontziak beren kabuz Mankomunitatearen garbiguneetan utz ditzakete.

23.2. Beirazko ontzien frakzioan beirazko botilak, kontserba-potoak (kristalezkoak) eta, oro har, ECOVIDRIOren «puntu berdea» logoa daramaten beirazko ontzi guztiak jasotzen dira.

23.3. Debekatuta dago beirazko ontziekin beirazko ontziak ez diren beste material batzuk uztea, bereziki, bonbillak eta fluoreszenteak, ispiluak eta leihoak, zeramikazko platerak eta edalontziak. Debekatuta dago beirazko ontziak beirarentzat berariaz jarritako edukiontzietatik kanpo uztea. Debekatuta dago beirazko ontziak ezarritako ordutegitik kanpo uztea.

24. artikulua. Arroparen gaikako bilketa.

24.1. Zerbitzuaren erabiltzaileak arropa Mankomunitateak ezarritako egun, ordu, modu eta lekuan entregatzera derrigortuta daude.

Zerbitzuaren erabiltzaileek Mankomunitateak horretarako jarritako berde ilun koloreko edukiontzien barruan utziko dute arropa. Arropa beti poltsa itxitan sartuko da.

Bestalde, ekoizle edo edukitzaileek arropa beren kabuz Mankomunitatearen garbiguneetan utz dezakete.

24.2. Arropa frakzioan orotariko jantziak (kaleko janzkiak, kirolekoak, bainugelakoak, barruko arropa, etab.), etxeko arropa (mantak, izarak, ohazalak, edredoiak, errezelak, eskuoihalak, etab.), erabiltzeko egoera onean dauden oinetakoak, hainbat osagarri (gerrikoak, gorbatak, tiranteak, bufandak, eskuzapiak, eskularruak, poltsak, diru-zorroak, gerriko poltsak, etab.) jasoko dira.

24.3. Debekatuta dago arroparekin batera arropa erabilia, oinetakoak eta osagarriak ez diren beste material batzuk uztea, bereziki, alfonbrak eta moketak, garbiketa-tresnak (lanbasak, hautsa kentzeko trapuak, baietak, etab.), garbiketarako erabilitako trapu eta iruteak, ehundegietako oihal-zatiak. Debekatuta dago arropa horretarako jarritako edukiontzitik kanpo uztea. Debekatuta dago arropa

bere horretan, poltsan sartu gabe, aipatutako edukiontzietan sartzea.

25. artikulua. Pilen gaikako bilketa.

25.1. Zerbitzuaren erabiltzaileak pilak Mankomunitateak ezarritako egun, ordu, modu eta lekuan entregatzera derrigortuta daude.

Zerbitzuaren erabiltzaileek Mankomunitateak horretarako jarritako edukiontzien barruan sartuko dituzte pilak.

Bestalde, ekoizle edo edukitzaileek pilak beren kabuz Mankomunitatearen garbiguneetan utz ditzakete.

25.2. Frakzio horren barruan otsailaren 1eko 106/2008 Errege Dekretuak araututako edozein motatako pila eta metatzaile eramangarriak jasotzen dira.

25.3. Pilekin batera debekatuta dago kargagailuak eta urrutiko aginteak (TBkoak, musika eki-poetakoak) uztea. Debekatuta dago pilak horretarako jarritako edukiontzitik kanpo uztea.

26. artikulua. Landare-olioaren gaikako bilketa.

26.1. Zerbitzuaren erabiltzaileak olioia Mankomunitateak ezarritako egun, ordu, modu eta lekuan entregatzera derrigortuta daude.

Zerbitzuaren erabiltzaileek Mankomunitateak horretarako jarritako edukiontzi beix/laranjan barruan utziko dute landare-olioa. Erabilitako olioia beirazko edo plastikozko ontzi itxietan utziko da.

Bestalde, ekoizle edo edukitzaileek landare-olioa beren kabuz Mankomunitatearen garbiguneetan utz dezakete.

26.2. Frakzio horretan sukaldean erabilitako landare-olioa soilik sartzen da.

26.3. Debekatuta dago automobilgintzako erabilitako olioarekin edo beste edozein likidorekin nahastea. Debekatuta dago olioia horretarako jarritako edukiontzitik kanpo uztea. Debekatuta dago olioia ontzirik gabe edukiontziaren barrura botatzea.

27. artikulua. Hondar-frakzioaren gaikako bilketa.

27.1. Zerbitzuaren erabiltzaileak derrigortuta daude «hondar-frakzioa» edo «erreusa», hau da, birziklatu ezin diren hondakinez osatutako frakzioa, Ibarako Udalak ezarritako egun, ordu, modu eta lekuan entregatzea.

Zerbitzuaren erabiltzaileek hondar-frakzioa Mankomunitateak horretarako jarri dituen edukiontzien barruan utziko dute, edo «atez ateko» bilketa-sisteman horretarako adierazitako leku eta moduan.

Edukiontzi bidez biltzeko modalitatean, hondar-frakzioa berariazko edukiontzian utziko da, hermetikoki itxitako plastikozko poltsatan, 20:00etatik 22:00etara, hondakin horiek jasotzeko egunaren bezperan, jaiegunak barne, Urteberri-egunean (urtarrilak 1) eta Eguberri-egunean (abenduak 25) izan ezik, egun horietan ez baita bilketa-zerbitzurik izango.

27.2. Hondar-frakzioan sartuko dira pixoihalak (haurtxo eta helduenak), konpresak, tanpoiak eta

norberaren higieinarekin lotutako beste produktu batzuk, xurgagailuaren hondarrak, erratzarenak, bizarra mozteko eta depilatzekeo xaflak, kosmetika oihaltxoak, preserbatiboak, arrandegi eta harategiko paper zikina, tirak, bendak eta antzekoak, boligrafoak, errotulagailuak eta antzekoak, puskatutako jokoak, zeramikazko platerak eta edalontziak, zigarro-puntak eta hautsontzi-hondarrak, animalien gorotzak.

«Atez ateko» bilketaren modalitatean, Mankomunitateak pixoihalak jasotzeko berariazko bilketa bat egin dezake erabilera horretarako jarritako edukiontzien bidez, hondakin mota horiek sortzen dituztenentzat edo egokitzen jotzen duen beste sistemaren bat.

27.3. Hondar-frakzioa jasotzeko «atez ateko» modalitatea duten udalerrietan, debekatuta dago birzikla daitekeen edozein material hondar-frakzioarekin entregatzea. Kasu horretan, bilketa-zerbitzuak hondakin horiek jasotzeko uko egin diezairoke eta erabiltzailea derrigortuta egongo da bilketa-puntutik kentzea gehienez 24 orduko epean. Entrega, nahitaez, aurrez Mankomunitateak emandako kubo kodetuen bidez egingo da.

Edukiontzien bidez biltzeko modalitatean, debekatuta dago hondar-frakzioa horretarako dauden edukiontzitik kanpo uztea. Debekatuta dago hondar-frakzioa dagokion edukiontzian soltean sartzea, kubo, pakete, kaxa eta antzekoen bidez.

Debekatuta dago hondar-frakzioarekin edo erreusarekin batera, hondakin likidoak edo likidotu daitezkeen hondakinak uztea.

II. KAPITULUA. BILKETA BEREZIAK

28. artikulua. Etxeko gauza handien bilketa.

28.1. Mankomunitateak etxeko gauza handien bilketa berezia eskaintzeko zerbitzu bat ezarri du. Zerbitzuaren erabiltzaileek Mankomunitateak zehaztutako egun, ordu, modu eta lekuan entregatu beharko dituzte etxeko gauza handiak.

Jarraian azaltzen diren entrega-baldintzak interes publikoa dela eta alda daitezke, zerbitzuaren beharren arabera betiere.

Bilketa-egutegia honako taulak zehazten du:

Udalerrria: Ibarra.

Bilketa eguna: Ostegunero.

— Bilketa jaiegunetan ere egingo da, Urteberri-egunean (urtarrilak 1) eta Eguberri-egunean (abenduak 25) izan ezik. Kasu horietan egun bat lehenago edo beranduago egingo da bilketa.

— Bilketa egunez egingo da, goizeko 06.00etatik 13.30era artean.

— Zerbitzua erabili nahi dutenek Mankomunitateak horretarako jarritako telefono zenbakira deitu beharko dute aurrez, eta gero, etxeko gauzak Mankomunitateak zehaztutako gunean utziko dituzte, txukun, lurzoruan, oinezkoen eta ibilgailuen pasabidea oztopatu gabe. Gauzak bilketa-egunaren bezperan utziko dira, 20.00etatik 22.00etara bitartean.

Bestalde, ekoizleek gauza handiak beren kabuz Mankomunitatearen garbiguneraren batean utzi ditzakete.

28.2. Gauza handien artean sartzen dira altzariak, etxetresna elektrikoak eta etxean erabilgaitzak diren bestelako gauzak.

28.3. Debekatuta dago tresna mekanikoen bidez (garabiak, poleak, etab.) mugitu behar diren hondakinak botatzea, ezta berehalako garraiorako prest ez dauden gauzak ere. Debekatuta dago - etxeko gauza handiak beste mota bateko hondakinekin batera botatzea, eta batez ere, eraikuntza eta etxeko konponketa-lan txikietatik eratorritakoak, pneumatikoak eta Ordenantza honen arabera derrigorrez hartu behar ez diren bestelako hondakinak. Debekatuta dago gauzak Mankomunitateko zerbitzuak ezarritako egun eta ordutegietatik kanpo uztea.

29. artikulua. Merkataritza-kartoiaren bilketa.

29.1. Mankomunitateak merkataritza-kartoiaren bilketa berezia eskaintzeko zerbitzu bat ezarri du. Zerbitzuaren erabiltzaileek Ibarako Udalak zehaztutako egun, ordu, modu eta lekuan entregatu beharko dute kartoia.

— Horretarako, Mankomunitateko zerbitzuek gune jakin batzuk zehaztuko dituzte merkataritza-kartoia biltzeko.

— Zerbitzuaren erabiltzaileek kartoia dagokion puntuan utzi beharko dute, behar bezala tolestu eta multzokatuta, ahalik eta bolumen gutxien okupa dezan, oinezkoen eta ibilgailuen pasabidea oztopatu gabe.

— Kartoia berau biltzeko zehaztutako egunetan utziko da, 20:00ak eta 22:00ak bitartean, larunbat eta igandeetan eta Eguberri eta Urteberri egunean izan ezik.

Bestalde, ekoizleek merkataritza-kartoia beren kabuz Mankomunitatearen garbiguneetan utz dezakete.

29.2. Kartoiaren barruan sartzen dira dendari, ostalaritza-zerbitzu, bulego eta merkatuetako, baita bestelako zerbitzu-sektoreen jardueratik eratorritako kartoizko kaxa eta bilgarriak.

29.3. Debekatuta dago kartoiarekin batera kartoi garbiak ez diren beste material batzuk uztea, bereziki plastikoak, zumitzak, etab. Debekatuta dago merkataritza-kartoia Mankomunitateko zerbitzuak ezarritako egun eta ordutegietatik kanpo uztea. Debekatuta dago merkataritza-kartoia tolestu gabe uztea, oinezkoen edota ibilgailuen pasabidea oztopatzen baitu.

30. artikulua. Hildako etxe-abereen bilketa.

30.1. Mankomunitateak bilketa-zerbitzu berezi bat ezarri du hildako zakur eta bestelako etxe-abereak biltzeko. Hildako etxe-abereak biltzeko eskaera (etxeetan, albaitari-kliniketan, haztegiatan, bizitegiatan edo aterpetxeetan daudenak) Mankomunitatearen bilketa-zerbitzuari egingo zaio. Zerbitzuaren erabiltzaileek Ibarako Udalak zehaztutako egun, ordu, modu eta lekuan utziko dute aberea.

30.2. Zerbitzu honetatik kanpo leudeke abeltzaintzako ustiategiatan hildako animaliak, baita 2009ko urriaren 21eko Europako Parlamentuaren eta Kontseiluaren 1069/2009 Araudiak babesten dituen animalien gorpuak ere.

30.3. Debekatuta dago hildako etxe-abereak kontrolik gabe uztea.

31. artikulua. Merkatuetako hondakinen bilketa.

31.1. Mankomunitateak merkatuetako hondakinak bereizita biltzeko zerbitzu berezi bat ezarri du. Azoketan produktuak saldu nahi dituztenek, baita merkatuaren inguruko merkatariak ere, beren jardueratik eratorritako hondakinak bereizi behar dituzte, eta Mankomunitateak zehaztutako moduan eta lekuan entregatu.

Horretarako, Mankomunitateko zerbitzuek, udal garbiketa-zerbitzuekin koordinatuta, hondakin mota ezberdinak bereizita dituzten edukiontzia dituen gune bat zehaztuko dute. Zerbitzuaren erabiltzaileek hondakinak bilketa-puntura eramane behar dituzte, sortu dituzten puntutik, hondakin bakoitzari dagokion edukiontzia dagoen punturaino.

Postua kendutakoan, gunea garbi egon beharko da, hondakinik gabe, udal garbiketa-zerbitzuak azken garbiketa egin baino lehen.

31.2. Mankomunitatearen eremuaren barnean egiten diren asteroko hainbat merkatutan sortutako hondakinen kantitatea eta horien motaren arabera, Mankomunitateko zerbitzuek ezar dezakete, merkatu bakoitzerako, jarraian azaltzen diren hondakin guztien edo batzuen bereizitako bilketa:

— Kartoia.

— Materia organikoa.

— Plastiko eta metalezko ontziak.

— Zura.

— Hondarrak.

31.3. Debekatuta dago hondakin zehatz bati dagokion edukiontzian beste mota bateko hondakinak uztea. Debekatuta dago hondakinak edukiontzietatik kanpo uztea. Debekatuta dago edukiontzietan merkatuko jardueretatik kanpo sortutako hondakinak uztea, horretara zuzenduta baitaude edukiontzi horiek.

32. artikulua. Garbigune zerbitzua.

32.1. Garbigune zerbitzua ezarri da, noizbehinkako etxebizitzako jardueratik sortutako hondakinak jasotzeko, baita Mankomunitateak bildu behar dituen bestelako hondakinak biltzeko ere, adibidez:

— Obra eta konponketa txikietako eraikuntza-hondakinak.

— Automobilgintzako pneumatikoak.

— Tresna elektriko eta elektronikoen hondakinak, 208/2005 Errege Dekretuak ezarritakoaren arabera.

— Etxeko hondakin arriskutsuak (pilak eta metagailuak, pintura zaharkituak, bernizak, itsasgarriak, garbiketa-produktuak, automobilgintzako olioak, autoetako bateriak, disolbatzaile ez halogenoak, hustutako aerosolak, hustutako plastiko edo metalezko ontzi kutsatuak, erretxina oretsua, tonerrak eta tinta-kartutxoak, etab.).

— Txatarra.

— Egurrak.

— Papera eta kartoia.

— Plastikoak.

— Etxeko gauza handiak.

— Inausketa eta lorezaintzako hondakinak.

— Bestelakoak: Erabilitako arropa, sukaldeko olioak, beirazko ontziak, etab.

32.2. Garbigune zerbitzua doakoa izango da etxeko erabiltzaileentzat eta ez du dagokion Ordenantza Fiskalean aurreikusitako tasarik eragingo.

32.3. Garbigune zerbitzuaren erabilera Mankomunitateak zehaztutako baldintzen arabera egingo da.

III. TITULUA

ZIGOR ARAUBIDEA

I. KAPITULUA. XEDAPEN OROKORRAK

34. artikulua. Sarrera.

Ordenantza honi dagozkion arau-haustek Titulu honetan xedatutakoaren arabera zehatuko dira, dagozkien erantzukizun zibil eta penalen kalterik gabe.

35. artikulua. Prozedura.

Testu honetan adierazitako arauak ez betetzeagatik dagozkien erantzukizunak hartu behar dituzten pertsonen zigorrek ezarri ahal izango zaizkie, Euskal Autonomia Erkidegoko Administrazio Publikoen zigortzeko ahalmenari buruzko otsailaren 20ko 2/1998 Legean adierazitakoa eta uztailaren 28ko 22/2011 Legea urratzeari buruz abuztuaren 4ko 1.398/1993 Errege Dekretuan adierazitakoa bete eta dagozkien prozedura erabili ondoren.

36. artikulua. Arau-haustek bideratzeko eta zigortzeko ahalmena.

Uztailaren 28ko 22/2011 Legearen 49.3 artikulua ezarritakoaren arabera, hondakin arriskutsuak kontrolik gabe utzi, isuri edo ezabatzen bada, edo Ordenantza honetan aurreikusitako baldintzak bete gabe entregatzen badira, zigorrek ezartzeko ahalmena arau-haustea egin den udalerriko alkateari dagokio. Horretarako, Mankomunitateko zerbitzuek eta mankomunitateko udal zerbitzuek elkarrekin lan egingo dute, ordenantza honetan aurreikusitako arau-haustek ikuskatzeko eta salatzeko. Mankomunitateak hala eskatuta, Udalak ez badu zigor prozedura hasten, eskaera egin den egunetik kontatzen hasita 10 eguneko epean, Mankomunitateko Lehendakariak arau-haustea bideratu eta zigortu ahal izango du.

37. artikulua. Hondakinen titular erantzulea.

37.1. Hondakinek titular erantzule bat izango dute beti, kasu bakoitzean hondakinen erabiltzailea, sortzailea, edukitzailea edo kudeatzailea izan daitekeena.

37.2. Erantzukizun administratibotik kanpo geratuko dira, bakar-bakarrik, hondakinak Mankomunitateari entregatu dizkietenak Ordenantzak eta gainerako araudi aplikagarria betez, edota hondakinak horien kudeaketa-lana egiteko beharrezko baimena duten kudeatzaileei eman dizkietenak.

38. artikulua. Arau-hausteen arduradunak.

38.1. Kapitulu honetan ezarritako arau-hauste administratiboak egiteagatik zigortuko dira pertsona fisiko edo juridikoak, Ordenantza honetan ezarritakoaren arabera eta Ordenantza honetan adierazitako arau-hausleen dagozkien erantzukizun zibil, penal eta ingumenari dagozkienei kalterik gabe.

38.2. Ordenantza honetan ezarritakoa pertsona bati baino gehiagori dagokienean, modu solidarioan erantzungo diote diru-zigorrari, azaroaren 26ko 30/1992 Legearen 130.3 artikulua, Herri Administrazioen Araubide Juridikoaren eta Administrazio Prozedura Erkideari buruzkoak xedatutakoaren arabera.

38.3. Erantzukizuna solidarioa izango da ondorengo kasuetan:

- a) Hondakinen jabeak, edukitzaileak edo kudeatzaileak hondakin horiek legez baimendutakoa ez den pertsona fisiko edo juridiko bati ematen dizkionean.
- b) Erantzuleak bat baino gehiago direnean eta horietako bakoitzak dagokion arau-haustean zenbaterainoko partaidetza izan duen zehazterik ez dagoenean.

38.4. Hainbat pertsonen jardueren metaketaren ondorioz ingurumena kaltetu bada, administrazio eskudunak erantzukizuna eta horri dagokion ondorio ekonomikoak indibidualki zigor ditzake.

II. KAPITULUA. ARAU-HAUSTEAK

39. artikulua. Lege-tipifikazioaren garapena.

Kapitulu hau uztailaren 28ko 22/2011 Legearen 49.3 artikulua (46.3.c) artikuluari loturik alor honetan Toki Erakundeei esleitutako zigortzeko ahalmenaren eta arau-hausteen garapen gisa erregulatu da.

Artikulu horien arabera, Toki Erakundeko titularrak, arau-hauste larria egiteagatik, hots, «edozein hondakin-mota ez-arriskutsu kontrolik gabe utzi, bota edo deuseztatzeagatik, ingurumenarentzat kalte edo hondamen larririk eragin gabe edo pertsonen osasuna arrisku larrian jarri gabe, zigor bat jarri ahal izango du, 901 eta 45.000 € bitartekoa».

40. artikulua. Arau-hauste motak.

40.1. Arau-hauste oso larriak izango dira:

- a) Edozein hondakin-mota ez-arriskutsu kontrolik gabe utzi, bota edo deuseztatzea, ingurumenarentzat kalte edo hondamen larririk eragin gabe edo pertsonen osasuna arrisku larrian jarri gabe.

- b) Mankomunitateko bilketa-bitartekoei eta hondakinen tratamenduari nahita kalte egitea, horiek erabat suntsitzea edo zerbitzutik ezabatzea xedetzat duten bitarteko edo moduen bidez.
- c) Arau-hauste larriak errepikatzea. Errepikatzea, urte batean gutxienez bi arau-hauste larri egiten direnean gertatuko da.

40.2. Arau-hauste larriak izango dira:

- a) Bilketa-guneetan Ordenantza honetan bildu behar ez diren hondakintzat jotzen diren edozein hondakin mota uztea.
- b) Bilketa-zerbitzuaren erabiltzaileak, arrazoi justifikaturik gabe eta nahitaezkoa denean, uko egitea berak sortzen dituen hondakinak aipatutako zerbitzuaren esku jartzeari.
- c) Hondakinak jaso eta tratatzeko bitartekoei funtzionalki edo estetikoki kalte egitea, aurreko paragrafoko b) atalean oso larritzat jotzen ez bada.
- d) Edukiontzia mugitzea, lekuz aldatzea edo manipulazioa, betiere egoera arriskutsuak edo hondakin-bilketa zaildu dezaketen egoerak sor badaitezke, administrazioaren alde aurreko baimenik gabe.
- e) Hondakinen zamaketa-lanak eta garraioa oztopatzea edo galaraztea.
- f) Hondakinak zuzenean estolderiatik edo saneamendu-saretik botatzea.
- g) Dagokion zerbitzuak bildu aurretik bide publikoan dauden hondakinak manipulatu, hautatu eta lapurtzea.
- h) Arau-hauste arinak errepikatzea. Errepikatzea, urte batean gutxienez bi arau-hauste arin egiten direnean gertatuko da.

40.3. Arau-hauste arinak izango dira:

- a) Hondakinak edukiontzietatik kanpo edo Mankomunitateak hondakinak uzteko adierazitako lekuetatik kanpo uztea, edo zerbitzuaren egutegitik edo ezarritako ordutegitik kanpo uztea.
- b) Hondakinak bide publikoan kokatutako paperontzietan uztea edo bide publikoan aldi baterako jarritako obra-edukiontzia hondakinak uzteko erabiltzea.
- c) Substantzia likidoak edo likidotu daitezkeenak edo isurketak eragin ditzaketenak dauzkaten hondakinak uztea.
- d) Gaika biltzeko «atez ateko» zerbitzua ezarrita dagoen udalerrietan, hondakinak nahastuta uztea, hondakin-fluxu jakin baten gaikako bilketaren zerbitzuaren motaren arabera bereizi gabe, ondorengo tratamendu espezifikoa zailtzen baitu.
- e) Gaika biltzeko «atez ateko» zerbitzua ezarrita dagoen Mankomunitateko udalerrietan, hondar-frakzioan birzikla daitezkeen hondakinak uztea edo baliotu daitezkeen frakzio bakoitzean eskatu ez diren bestelako hondakinak uztea.
- f) Ordenantza honetan bildutako beste arau-haustek, zuzenean arau-hauste larri edo oso larritzat tipifikatu ez direnak.

III. KAPITULUA. ZIGORRAK

41. artikulua. Zigor motak.

Aurreko artikuluan aurreikusitako arau-haustek egiten badira, honako zigorrak ezarri ahal izango dira:

a) Arau-hauste oso larriak:

— Isuna: 450,50 € eta 45.000,00 € bitartekoa.

b) Arau-hauste larriak:

— Isuna: 90,11 € eta 450,49 € bitartekoa.

c) Arau-hauste arinak:

— Ohartarazpena.

90,10 € bitarteko isuna.

42. artikulua. Zigor-ezarpena.

Zigorrak honako hauen arabera ezarriko dira: Arau-haustearen eragina, pertsonen osasun eta segurtasunari dagokionez garrantzia, erantzulearen egoera, bere intenzionalitate-maila, parte-hartzea eta lortutako onurak, errepikatzea, urte berean mota berdineko arau-hauste bat baino gehiago egiteagatik, behin-betiko ebazpen batek ezarri badu, eta eragindako kalteen itzulezintasuna.

43. artikulua. Jarduera osagarria.

Arau-hausleak behartuta daude utzitako hondakinak kentzera eta zikindu duten ingurua garbitzera, dagozkien zigorrak kontuan izan gabe.

XEDAPEN GEHIGARRIAK

LEHEN XEDAPEN GEHIGARRIA. -ORDENANTZA OROKORRAREN GARAPENA

Mankomunitatea osatzen duten udalek haien lurralde-eremuan hoberen egokitzen den tresna juridikoaren bidez garatu ahal izango dute Ordenantza hau. Helburua da Ordenantza hobeto aplikatzea, eta ondorioz, aurreko araudia, egun dauden erabilerak eta ohiturak bateratzea, egokitzea eta bateragarri egitea, kontuan hartuta betiere auzoak, herrigune historikoak, populazio sakabanatua, landa-guneak, ibilgailuen irisgarritasuna, aukeratze-sistema, sorburuko bereizketa, bilketa, hasierako tratamendua, elkartzea, trinkotzea, garraioa, lan-ordutegiak eta baldintza teknikoak, baldintza higieniko sanitarioak, apaintasun publikoko baldintzak, eraginkortasun-baldintzak eta baita ordenantza berri honen eta aplikagarria den legediaren edukia, filosofia eta xedea hobeto betetzeko eta kudeatzeko udalek finkatzen dituzten antzeko baldintzak ere.

Ordenantza hau ordenantza, araudi, bando edo instrukzio bidez garatu ahal izango da baldintzen arabera eta Udal bakoitzak hartutako erabakiaren arabera.

Nolanahi ere, garapenak zehatz-mehatz bete beharko ditu Ordenantza Orokor honen printzipioak, zuzenbidearen iturriak eta mankomunitatearen interes orokorrak.

ARAUDI GEHIGARRIA

Ordenantza honetan aurreikusi ez diren gai guztietan Hondakin eta lurzoru kutsatuei buruzko uztailaren 28ko 22/2011 Legeak xedatutakoari men egingo zaio baita Tolosaldeko Mankomunitatea osatzen duten Udalen eremuan etxeko eta merkataritzako hondakinak bildu eta tratatzeko zerbitzua arautzen duen ordenantzari ere. Bestalde aplikagarri izan daitezkeen gainerako araudiei ere.

AZKEN XEDAPEN INDARGABETZAILE OROKORRA

Indargabetuta geldituko dira mankomunitatea osatzen duten Udalek onartu dituzten eta Ordenantza honen edukiaren aurkakoak eta bateraezinak diren maila bereko eta apalagoko Ordenantzak, Araudiak, Bandoak, Instrukzioak eta arauak (Ordenantzak, Araudiak, Bandoak, Instrukzioak).

AZKEN XEDAPENA, INDARRALDIA

Ordenantza hau, Ibarako Batzarrak behar bezala onartutakoa, legean agindu bezala bideratuko da eta bere testu osoa Gipuzkoako ALDIZKARI OFIZIALEAN argitaratu eta biharamunean sartuko da indarrean.